

Sikap terbuka perlu bagi majukan silat

a. Harien 00
31 JAN 1987
PINCANG SILAT

KUALA LUMPUR, Jumaat — Guru-guru silat negara ini diminta mengamalkan sikap dan fikiran terbuka dan positif bagi memajukan seni silat sebagai warisan budaya bangsa.

Setiausaha Parlimen Kementerian Kebudayaan, Belia dan Sukan, Haji Awang Jabar, berkata warisan budaya yang sangat tinggi nilainya itu patut diperkembangkan secara bijak, berpandukan peraturan yang kemas dan mencakupi bidang latihan yang berterusan sehingga layak ke peringkat antarabangsa.

Beliau menyatakan demikian ketika merasmikan mesyuarat agung perwakilan ke-21 Persatuan Seni Silat Cekak Malaysia di Dewan Serbaguna Taman Seri Keramat di sini, hari ini.

Katanya, seni silat sesuai dan wajar dikembangkan di institusi pengajian tinggi, sekolah dan di kalangan anggota tentera dan polis.



HAJI AWANG

"Usaha ini bukan sahaja akan dapat mengekalkan warisan budaya bangsa serta membentuk fizikal dan mental yang sihat, malah boleh menanam semangat patriotik di kalangan rakyat," katanya.

Beliau yakin melalui kegiatan seni silat, amalan tidak sihat di kalangan anak-anak muda dapat dikurangkan dan cita-cita untuk mencapai matlamat kebudayaan kebangsaan dapat diperkukuhkan.

Haji Awang juga berkata perbezaan antara pelbagai seni silat Melayu di negara ini tidak sepatutnya mewujudkan polarisasi dan menjadi punca perpecahan orang Melayu.

"Ia harus dilihat sebagai satu kekayaan seni budaya yang perlu dipupuk dan diperkenalkan ke seluruh rantau ini sebagai satu landasan bagi mencapai hasrat dan cita-cita memperkukuhkan perpaduan umat," jelasnya.

Beliau menyifatkan silat sebagai satu seni mempertahankan diri yang wujud sejak zaman dahulu dan ia mewujudkan pahlawan yang dapat mengekalkan keperibadian, kemegahan dan kesatuan rumpun bangsa Melayu.